

COMUNICATO n. 2461 del 31/08/2026

Àhevante von earst von hoachnach 2027 a sistèm zo darkhenna ke ma khânt di zungen vornaügart, mearar modèrn un nempar in kamòuschaftn

Zungmindarhaitn, naüge kritèrie vor di zertifikatziongen ladinar, möknar un zimbar

[Cimbro] Vürgelekk von vorsitzar Maurizio Fugatti da provintziàl Djunta hatt ågenump haüt zo vornaügra di kritèrie un di modalitét von prof boda sichart ke ma khânt di zungen un di kultùrn ladinar, möknar un zimbar nâ in sèll boda auzmacht daz provintziàl gesetz 6/2008. Dar provedimént iz di ende vonan bege boda hatt gesek panândar di Provìntz un di kamoüschaftn von zungmindarhaitn pinn starch schütz vodar Konferéntz von zungmindarhaitn un pinn positìf parér vodar VI rat Komisiong. Ma sait asó gelânk nidarzolega an briaf alle pittnândar boda iz auzkhent vonar arbat boda hârn genump toal in mearare, “Pinn zil zo macha mearar modèrn un zo nempra di laüt dar zung zertifikatziong un darzuar machanse mearar djüst un gelaich vor alle, gebante di djüstn rispòste in sèll boda hârn mângl di laüt alle tage, süachante zo haòta da kunt di bizzschaftege ma in da gelaichege zait zo macha destrâr di protzedùrn boda soìn mângl”- asó hatta khött dar vorsitzar Fugatti. “Haltante kunt vo ditza izta khent zornìrt zo ledrena di djar boma mage abegem in esâm vüaranten afte sèchtza djar un zo bestetega ke berda hatt in atestàtt hatt rècht zo khemma drâ pellar in an konkùrs vor an öffentlesche arbat. Vornaügarn da linguistik zertifikatziong billz nètt soìn gemuant mindarn di qualitét, ma gem zuar dar zung von zungmindarhaitn zo giana vürsnen z’soina geredet un geschribet, azpe profesionèll strumént, a mittel zo macha khennen ünsar Autonomì” hatta no khött dar vorsitzar.

Di naüing regln inngevüart nemmen å di europèan standart QCER (von livèll A1 aftn C1) un gem zuar zo maga haltn guat bazma hatt gemacht djüst vor zboa trèff in 26 månat. ’Z zil iz daz sèll zo tüana offe starch in naüing djeneratziongen, azpe ma hatt sa khött, ’z izta khent asó ledrenart afte 16 djar di elte zo maga abegem di prüf un in di schualn boda gehöarn di kamoüschaftn von stòregen zungmindarhaitn di studjént vodar draite klasse vodar mittlschual mang abegem in esâm sin aftn livèll B1.

Ma hatt geglaicht di profesionèll profiln von öffentleschen arbatn un izta nemear mângl zo macha in prof vo taütsch vor di maistre von taütschan zungen boda sa hârn in zertifikatt B2 darkhennt von ministèro vodar “Istruzione e del Merito”.

Darzuar izta khent auzgemacht ke dar Comun General de Fascia hatt rècht auzolega an djaregen Albo vo ekspèrte zoa azta mang khemmen zornìrt bahémme di komisardje, haltante kunt von vil sesiongen, anvétze vor di zimbar un vor di möknar iz möglich nominàrn an komisardjo vor khurtza zait zoa nètt z’stiana stekhan azma nètt hettat zo venna a komisiong. Alle di naüing bartn varlèrn àhevante von earst von hoachnach 2027.

Übersetzt von Schaltarle vor di zung von Toalkamou vodar Zimbar Hoachebene

(cdt)

